

Ч. 32. (67.)

Крыница, четверг дня 29. серпня (16.) 1935.

Рок II.



Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Также просиме присылати членскы вкладки до Лемко-Союза.

Просиме присылати материал до календара на рок 1936.



Пренумерата в краю:

30 грошей місячно,

80 „ квартално

1.50 „ полрочно,

3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,

20 кор. рочно.

Конто чекове Нр. 404.155.

Укончено уж приготовлєня до сеймовых выборов.

Листы кандыдатов на послов сут уж на терені цілой Польщи усталены поодынокыма окружныма собраниям. Выбраны кандыдаты, согласно з законом, переслали до окружных комиссий заявленє, же годят ся кандыдовати в даном окрузі. По одержаню таких заявленєй окружны комисии выберательны затвердили листы кандыдатов на послов.

Предсідателі окружных комиссий выберательных оголосят найпозднійше до дня 29. серпня при помочи плякатов, во всіх громадах выберательного округа листу кандыдатов на послов, а также день и години, в котрых на терені цілого краю отбуде ся акт голосованя.

Уж тепер каждый выбератель знає, же с помедже назвиск, оголошенных в газетах, котры фигуруют на окружных листах кандыдатов на послов в числі 4-рох або веце, має дня 8. вересня выбрати два назвиска тых кандыдатов, до котрых має найвекше довірє. Назвиска тоты означит лєнийком на одержаной в выберательном льокалю в дню голосованя выберательной карті.

Послами будут тоты два кандыдаты на послов, котры достанут в даном выберательном окрузі найвекше голосов и не меньше як 10.000.

Списы выберателей сут уж также усталены. Предсідателі окружных выберательных комиссий, по розсмотреню всіх реклямацій и спротивов выберателей, переслали уж рішєня до обводовых комиссий, где постановлены через них змєны сут уж переведєны через вписанє, або счеркненє выберателя с листы.

От того часу не можна уж робити нияких змєн в списках выберателей. Так усталєний спис выберателей буде ище раз выложєний до вселюдного перегляда в преддєнь голосованя через 5 годин в бюрах обводовой выберательной комиссии. Має то на ціли

уможливити заинтерєсованым провєрку, в який способ их реклямацій и спротивы были уладжєны предсідательом окружной комиссии.

Што маме робити при выборах.

Як уж выше пояснено, голосовати при выборах до Сейма, котры отбудут ся на терені цілой Польщи дня 8. вересня можна лєм на тых кандыдатов, котры сут выписаны на выберательных картках, яки каждый выбератель достанє в выберательном поміщеню в дню голосованя.

С тых чотырох, або веце назвиск выписаных на карті выбєре каждый выбератель одно або два назвиска, до котрых має найвекше довірє и при тых назвисках даст лєнийку. В виду того, же на окружных выберательных собраниях не поставлено и не выбрано ани одного нашого кандыдата, нам не дишат ся нич иншого, лєм голосовати на тых с помедже поміщенных на картках кандыдатов, котры относили ся все и относят ся тепер до нашого народа и до наших справ прихильно.

С помедже поставленых кандыдатов на Новый Санч и Новый Торг перши три кандыдаты походят с повіта ново-торжского и они напевно нас не знают так, як и мы их также не знаме. Наша доля и наши потребы экономичны и культуральны не обходят их и не будут обходить, бо они, — річ певна и зрозуміла, — будут старати ся о повіт ново-торжский, о Закопанє, Щавицу, Татры и Пєнины. Отдавати нам голоса на таких кандыдатов, котры нас не знают, нїт змысла. Прото треба с помедже кандыдатов выбрати когоси иншого, а та-ким єст

Яков Бодзоны

управитель школы. Єст он праві вшиткым нам добре знаный. Сын хлопа с сандецкого

повіта, постановил собі по уконченю школ жити серед хлопт и для хлопа ложити свой труд. Не знал отпочинку, свєта, ани вакацій, але в каждую свободну хвилю їздил по селах, читал рефераты, заохочал людєй до закладаня кооператывов и сельских организаций, а всьо то робил в ціли облегчєня хлопской долі и поправы єго быта. До руского населєня относил ся все справедливо и дружєлюбно и часто приїзджал в наши страны, штобы познакомити ся с проявами нашего культурального и экономичного житя. Тому, єсли бы наше населєнє дало ся збаламутити и отдало свой голос на инших, незнанных нам кандыдатов, зробило бы зле и спричинило бы шкоду самому собі, а кандыдатови выше наведеному вырядило бы кривду.

Кандыдатов других округов: Ясла и Сянока, не знаме близше и не можеме высказати ся о них. По информациям с повіта сяноцкого заслуєжє на попертє кандыдат Осиф Моравский.

С повіта горлицкого и ясельского найсимпатычнійшим для нас кандыдатом явят ся Казимір Дух, котрый был перед килькома роками старостом в Новом Санчі и дал ся нам познати, яко человек справедливый и до нашой sprawy добре успособлєный.

Зазначити при том мусимє, же ордынация выберательна выразно говорит, же єсли при одном назвиску, поміщеном на выберательной карті даме в прямоугольнику лєнийку, голос єст важный и тото означат, же мы голосуємє лєм на одного кандыдата.

В ділі выборов интересує нас ище одна справа, а именно: ци в виду того, што нам не признано ани одного кандыдата, мамє принимати участь в выборах, ци тыж лучше сидити в дома и не интересовати ся выборами.

По той кривді, яку нам выряджєно, не допушчаючи нашего представителя до Сейма, першим отрухом населєня было пропустити

выборы мимо нас и не интересовати ся нима. Але был то лем перший отрух, высказанный в жалю, бо скоро по нем пришло отверезе-нє, же нам не можна сходити с раз обра-ного пути и нашим обовязком єст не заломити ся николи, не ликовати в случаях успїха, але также и не зражати ся неудачами. Тому нам не можна не приняти участи в выборах дня 8. вересня, але

всі, як оден муж, мусиме отдати наши голоса.

Лем втотчас докажеме ище раз, што мы представляме организовану групу, с котром доконче треба ся числити. Штобы як най-векше число выберателей отдало свои го-лосы, треба доконче уж тепер выбрати по селах десятников, котры бы заохотили своих сусїдов до принята участи в выборах. Справа єст для нашего дальшого розвита важна и тому нехай никто не легковажит выборов, а наоборот нехай каждый, старый и молодой, мужчина и женщина, сполнит свой обовязок через отданє голоса в день выборов.

Што сказал Плк. В. Славек о избирательной агитации.

Предсидатель Рады Министров Плк. Славек принял редактора „Новин“ и на его запы-танє в ділі агитации при выборах, сказал:

Найліпше буде, если не буде жадной аги-тации. Выбератели сами знают до котрого кандидата маюи найвекше довірє. Агитация могла бы лем збаламутити выберателей. Спосеред кандидатов человек приличный и скромный не буде себе хвалити и других чернити, а такой, котрый буде того робити, заслугоє наименше на довірє. До работы в Сеймі потреба людей совїстных и спра-ведливых и не таких, што ся сами хвалят.

Одно, што было бы потребне, то безсто-ронный опис кандидатов каждого округа. Можна о каждом кандидаті сказати, кто он єст, але не робити с того агитации.

По той бесїді, редакция „Новин“ выдаст опис каждого кандидата и росшле до всіх избирательных округов.

Выборы тепер и давнійше.

Уж за тыждень отбудут ся выборы до Сейма. Дня 8. вересня избиратель выска-же ся, котрого с кандидатов хоче выслати яко посла до Сейма. Сут то уж послїдны дні и под стрїхами хат, в читальнях и ко-оперативах штораз частїйше чути бесїды, в котрых подносит ся добры, або злы свой-ства кандидатов. Народ сходит ся, меды-тує и радит так само, як при выборах гро-мадских. Радят людє, а пак вертают до своих обовязков и каждый выносит штоси с тых нарад: або набрал переконаия и до-вірє до своего кандидата, або перехылил ся на сторону другого, третьего, четвертого и пятого, бо преця лем двоє послов можна выбрати в каждом округі.

Не так то бывало в часі давних выборов. Сїзджали ся рїжны агитаторы на села, кот-рых давнійше никто не видїл и скликали людей на віча. Часом приїзджал аж и сам

кандидат на посла, в том часі барз для людей любезный прирекал людям золоты горы, при том чернил в страшный способ иншу партию и людей с той партии. Одны прирекали ділити помедже хлопов чужди фольваркы, другы освободити хлопа от податков, але наравду, то никто не ду-мал о долї и бїді хлопа, лем о посельском мандаті. С той ярмачной сваркы выходил посол, котрый показал ся погодивше лем втотчас на селі, як єму ходило, жебы в Вар-шаві знали, же он має мир у людей.

Днеска нїт вічей, нїт приречень, нїт сва-рок, никто посла не хвалит, ани ганит, але сут зато назвиска кандидатов, с посеред котрых каждый избиратель може собі выб-рати того, до кого має найвече переконаия и довірє. Тым кандидатам непотребна ві-чова сварка, бо каждый избиратель чул о них и знає их: Каждый знає, што они робили и як относили ся до народа и его справ. Прото тым людям непотребна рекля-ма, они не потребуют кланяти ся никому, ани никого просити, бо за нима бесїдує их дотеперешна діятельность и мир серед на-селєня. А такого котрый сам напрашат ся и себе хвалит — не треба выберати.

Тож в неділю, дня 8. вересня каждый в своей избирательной комиссии отдаст го-лос на тых, котрых єму подыкує совість.

Як выберат ся сенаторов.

Сенат єст в каждом парламєнті чинником розвагы и ума. Прото до Сената выберат ся людей поважных, котры отличають ся се-ред окружения умом, образованєм и довірєм. Прото и избирательна ордынация до Се-ната, не операт выборов до Сената на все-людном голосованю и право выбора признає лем дакотрым категориям граждан.

Активне право избирательне до Сената єст признане каждому обывательови, кот-рый єст отличеный через Державу за заслу-гы в ділі независимости, за храбрость и за заслугы положены в роботі повоевной для добра Державы. Право того признано так-же тым, котры маюи высши знания, аджек высши урядникам, судїям, прокураторам, ин-жинерам, лікарам, учителям, офицерам и т. д. Позатым признано того право членам само-управления територияльного и господарчого и членам организации фаховых и общест-венных, а то с тытула довірє, котре добыли собі завдяки их безинтересному труду для публичного добра.

Выборы до Сената сут двостепенны, то значит, граждане, маючи право выбора се-наторов творят в каждом избирательном обводі, собранє обводове и на том собраню, котре отбуде ся дня 25. серпня, выберут одного делегата до воеводской колєгий вы-берательной.

Дня 15. вересня зберут ся делегаты всіх обводов, находячих ся на терєні одного во-єводства в воеводском місті и утворят во-єводску избирательну колєгию, котра выбе-рат таке количество сенаторов, яке єст признане на данє воеводство. И так нпр. на воеводство львовске припадат 6-стох се-наторов, а на краковске 4-рох. Всїх сенато-ров с выбора єст 64, а же загальне число сенаторов выносит 96, то остальных 32 сенаторов назначат Президент Рїчипоспо-

литой с помедже граждан, маючих право выбора до Сената.

Так повстає друга законодательна палата котра контролює ухвалы Сейма.

Война италиянско-абисинска наближат ся.

О опасности войны италиянско-абисин-ской пишут газеты в каждом номері. Поло-женє єст дальше опасне и возможность выбуха войны росне с каждым дньом.

Недавно радила нац том справом Лига Народов. Понятно, не зроблено нич. Рїше-но лем, же в серпні сїдут ся представителі Англии, Франции и Италии и уладят недо-розумленє италиянско-абисинске.

И именно в послїдних днях отбыли ся в Парыжі наряды трох держав. Тревали коротко и были перерваны, бо делегаты не могли ся погодити. Делегаты Англии и Фран-ции ставяли рїжны предложєня, на котры не годил ся делегат Италии. Муссолини жадат полного протектората над Абисиниом и не хоче ити на жадны уступкы. Перер-ванє переговоров в Парыжі выкликало ве-лике враженє в свїті, бо наближат оно воз-можность войны. Дня 4. вересня збере ся ище раз Лига Народов для оговорєня той sprawy. Если однак Италия окаже ся даль-ше неуступчива, то Лига Народов нич не порадит и война може выбухнути в осени. А треба знати, же война италиянско-аби-синска може допровадати до грубых непо-розумлень медже Италиом и Англиом.

Революция в Альбании.

В Альбании выбухла дня 16. серпня рэво-люция. Проводыром повстанцов мал быти бывший предсидатель рады министров Бей Верлятси. Бунтовщикы посували ся ку сто-лиці и натрафили на правительственны войска. Мало прити до кырвавого боя, в котром згинул начальник правитель-ственных войск Тсемаль Ардас.

По вістям мало згинути в боях 150 людей. Инши вісти подають, же убито адютанта ко-роля, Ахмеда Цогу — генерала Галиярди-ого.

По урядовым комуникатам бунт здавлено и в цілом краю панує уж лад.

Причином бунта має быти невдоволенє части офицеров и державных урядников с заграничной политики теперешного пра-вительства.

Смерть знаменитого летчика.

Знаменитый летчик амерыканский, одно-окий В. Пост, котрый облетїл счастливо два раз цілу землю доокола, згинул в ми-нувшом тыждні в летничой катастрофі. Выбрал ся он на самолєті до полночного бігуна и в половині дороги лет закончил ся катастрофом. Летчик Пост згинул с това-ришом, актором Рогерсом. Катастрофа тота выликала в цілой Америкі величезне враженє.

Як нищити пырей.

Пырей належит до буряну, котрый барз трудно зничити. Найбарже зарастат грунты легкы, пісковаты, нестаранно оброблены, где пущат под земльом новы отногы, котры задерняють почву, закореняючи ся все наново.

На запыреном ґрунті, нигда ся добре не уродит и уроджаи сут все планны. Одино-кым способом нищення пырею на ґрунтах середно легкых єст плитке подоранє стерни. Плуг пустити цілковито плитку, штобы подорвати лем тоту верству, в котрой отногы пырею розрастають ся найвеце. Важне єст, штобы орати так скоро, жебы скыбы не укладали ся одна на другу, лем были порозриваны и стояли шторцом. Скыбы тонькы, нашторцованы пересыхають скоро и уж по пару днях можна пустити борону и рала, штобы вывлечи пырей, котрый не держит ся в сухой землі, а совялый єст меньше крехкый и дає ся легко выборонити.

Если по одном таком плитком подораню, побороненю, або выраленю видно ище много пырею, то треба ниву ище раз в осени плитком переорати и по высушеню пырей вывлечи. До вывлеченя пырею надають ся бороны о зубах спереду гладкых, округлых, не гранчастых, або рала о широких спереду лапах. Боронами издити поволи, жебы не розривати пырею.

В случаю сильного запырення добре єст переорати поле под зиму глубоко на 20 до 25 см. и вчас на яр без отвертаня землі за-сіяти кус густійше.

На полях сильнійших пырей розрастат ся помальше, але зато труднійше єго вынищити, як ся розмножит. В тих случаях на ґрунтах сильнійших треба зараз по плитком спокладаню пустити бороны, а потом рало, штобы пырей vybrати. Однак за одним разом пырей не даст ся вынищити, бо єст то бурян, котрый треба ипорно штороку нищити старанном управом землі. Вывлеченый пырей треба зграбати и вывезти на компост.

**Податковы льготы для господа-
даров.**

Появилось заряженє Министерства Скарбу с дня 1. т. м. в ділі податковых льгот для властителей господарств рольных.

Заряженє тото относит ся до незаплаченых податков на добро скарбу, а также всіх других належностей публично-правных, як нпр. данины комунальны, оплаты дорогов, оплаты асекурацийны и т. д. побераны от властителей рольных господарств.

Заряженє тото вздержує до дня 15. жолтня т. р. всі екзекуции за незаплаченный податок ґрунтовый, доходовой, разом с крызысовым и комунальным, маєтковый и незвычайну данину маєткову.

На основі того заряження уряды скарбовы выключат безотложно с дальшого поступованя екзекуцийного тытулы выконательны, котры обнимають наведены податкы аж до дня 15. жолтня т. р.

Вздержану екзекуцию уряды-скарбовы начнут наного 15. жолтня т. р.

Заряженє тото не относит ся до платников злой волі и в исключительных случаях платников опорных, котры не платят податков без екзекуции. Против таким платникам можна буде вести екзекуцию.

ЗНИЩЕНЄ СПОЛУЧЕННЫХ ДЕРЖАВ.

Статыстыкы выказують, же тогорочна посуха и страшны бури пісковы спричинили амерыканскому рольництву величезны шкоды. Нарочна комиссия потвердила же вітры засыпали піском перешло 51 миллионов акров орного поля. Біда ширит ся дальше и по мнію знатоков, може великы пространства замінити в пустыню. Нарочный правительственный комисар потверджат, што если не приступит ся отраз до наводнення краю и ратованя засыпанных піском теренов, то за 100 літ Сполучены Державы будут выглядати, як пустыня.

ЗАРУБАЛ СОКЫРОМ 14 КОРОВ.

Вал-Бартковский, літ 28. сын богатого господара в повіті гнєзненском в часі атаку шалу хопил за сокыру и зарубал в стайні 14 коров. Погодивше хотіл подпалити господарство, але в том перешкодила єму родина, котра пробудила ся от рыку забиваной живины.

Кто знає, ци шаленый не вымордовал бы родины, по подпаленю хаты, если бы єго начас не уярмлено.

НА ОКО И НА МІРУ.

Живый инвентар подносит ся в ціні, особенно, если єст добре удержанный. Штука велика, добре выроснена и удержана вартат веце, як дві штуки забіджены и малы. Прото газда повинен старати ся продукувати лем товар добрый, бо лем втотчас оплатит ся належито єго труд и за пашу достане в мясі звиряти добру заплачу. Знаме с досвідов, же особенно на експортый товар, надающий ся на вывоз за границу, ціны сут и напевно будут добры и они рішають о цінах на рынках краєвых.

В годовлі живого инвентара о успіхах материяльных рішат передовсем добре кормленє живины. Але часто газда розуміє тото ошибочно, судячи, же потреба, штобы жолобы и драбины были полны. Тымчасом każde звиря може с'істи лем тилько, килько потрафит помістити єго желудок. Если в жолобі ци корыті остає паша невыїджена, то она псує ся звычайно без жадной користи, не бесідуючи уж о том, же остатки тоты стігають до жолобов мыши и щуры, котры множат ся страшно. Если за драбином остає сіно, або зелена паша, звиря по утоленю першого голода, остатки вытігат, глядаючи чогоси ліпшого, розметує нашу коло себе, в послідстві чого дуже доброй паши, потребной, особенно под весну, иде до навозу.

Нич дивного, же в малых господарствах часто встрічає ся с таким явленям, же в осени по роботах, живина має полны жолобы и драбины, а под яр примерат голодом и газда мусит продавати такы забіджены штуки за полдармо. Тым пояснят ся, чом живина єст у нас на весну дешева, и ціна єй подносит ся аж по весні.

Если бы газда в осени обчислил собі докладно количество посіданой паши, мог бы ся сориєнтовати, килько штук може перезимовати и килько може им денно давати так, штобы не лем не зазнали голода, але на час продажи были добре выпасены.

Не вымагат тото нияких выдатков, лем до важения сіна и паши треба мати звычайну

пружинну вагу, котра не коштує дуже. Выдаток тот оплатит ся напевно, бо жаден досвід не заступит вагы и міры. Звиря має достати тилько, килько ся єму належит, ани меньше, ани веце. Така розумна ошадность єст потребна особенно там, где количество паши єст ограничене, передовсем на малых господарствах. Яко засаду каждый газда повинен принять, же чим меньше єст паши, тым потребнійша єст вага и міра.

ЯК ПЕРЕХОВАТИ ЯЙЦА.

Добра газдыня складат в осени яйца, штобы мати их в зимі; коли куры ся не несут. Складаны яйца переховує ся в ріжний способ.

Найпростшим способом єст перехованє яиц в житі. Знесены попередного дня смарує ся вазелином, втираючи омасту в шкарлупу. Пак завиват ся każde яйцо в папер и укладат одно коло другого в деревяной пачці и пересыпує ся яйца сухым житом. Держати в сухом и холодном місці, бодай не змерзли.

Переховують также яйца
в вапняной воді

Чисты и свіжи яйца натерти скором солонины и уложити в каменном горнци тонши-мā концами вдолину. На дно горнца дати чистый пісок. Попередного дня пригото-вити вапняну воду. На 10 дкг. негашеного вапна наляти пол літра воды. Як вапно начне дымити, доляти ище покус 5 л. воды. Другого дня сцідити осторожно, штобы не сколотити осаду, додати до той воды 1/2 кг. кухонной соли, вымішати и залати яйца.

Можна также переховати яйца
в кухонной соли.

На дно сыпе ся мілку кухонну соль, укладат ся яйца тоншим концом надолину и пересыпує ся каждую верству сольом Держати в сухом місці.

СОЛЕНЄ ОГУРКОВ НА ЗИМУ.

Дно бочки выстеляє вишньовым або хріновым листєм, до котрого додаєме ко-пер, чеснок и соль и укладає верствами дробны, свіжы, обтерты чистом шматком огуркы. Версты перекладає листєм, котре даєме также на верх бочки. Бочку забиває щильно, заливає смолом и даєме до пивниці. Можут держати ся долго.

Кто любит так звану мизерию (салатку) с огурков, може ю собі зробити и на зиму. Оберат ся со скоры огуркы, крає ся на плястеркы и солит. По трох годинах зливат ся воду и вытискат огуркы в чистом, полотняном мішечку.

Отдільно варит ся винный оцет с попрьом и бобковым листєм. По выстуженю укладат ся вымішаны с оцтом огуркы в малы сло-ики и завязує ся мокрым, пергаминовым папером.

ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО“

Што чути в світі.

В Калифорнії толпа народа заатакувала кількох місцевих комуністів, обляла їх смолом і обліпила пірєм. Трьох комуністів побито, а одного змушено вийти з мешкання слезним газом.

С Німеччини приплинув до Гдині німецький військовий корабель Кенігсберг з ревизитом до польської військової маринарки. На кораблі приїхало 25. офіцерів, 12 подофіцерів і 550 моряків.

В Босні, Югославії дошло до кривавого столкнення населення з жандармерією. Двоє людей убито, 5 єст тяжко а 19 легко - ранених. Причиною столкнення єст релігійний антагонізм медже православними а музулманами.

В Чехах поднесли ся сильно ціны акцій військового промисла по одержанню вісти о перерванню конференції в Паризі, што поясняют собі, же війна італіянсько-аби-синська єст неизбіжна. Дакотры акції подскочили о 45 корон.

В Амерыці має отбыти ся в листопаді т. р. вибор президента Сполучених Держав. Противники Рузвельта уж тепер начали агітацію. Они высують против нему, же: 1) он впровадил новы податки (доходовый и наслідсвенный) 2) же за него увеличат ся дефіцит бюджетный и 3) увеличат ся число безработных, котре выносит 10 миллионів.

В Німеччині кружат вісти, же правительство хоче затыгнути нову внутренню позичку в висоті 1 миллиарда марок в банках и касах ощадности. Вісти тоты сут до того часу неспроверены.

Малпы свідком убийства. В Индиях замордовано катаринара, котрый ходил от села до села с трьома малпами. Коли бандыты напали на катаринара, малпы утекли в крякы и виділи, же убийцы скрыли тіло в гущавині. Малпы побігли до дому, где жил и шарпаючи єго жену, запровадили ю на місце преступления. Жена дала знати о убийстві полиції, котра зловила преступников. Преступники початково выперали ся, але малпы, як их узрили, шмарили ся на них и начали кусати так зажерто, же перестрашены, признали ся до убийства.

С Берлина доносят, же на председателя конгреса коминтерна в Москві, Димитрова зробили замах, котрого доконал поручник сов. армии Шобольнев, стріляючи до Димитрова и раничи єго тяшко. Димитров єст комуністом болгарским, котрого в прошлом року судили в Берлині за мнине подпаленє Райхстага.

Агенция совітска Тасс оголосила комунікат, в котром перечит тым вістям.

Газеты Францускы доносят, же в Лондоні панує пересвідченє, же скорше ци познійше мусит прити до дыскусии медже європейскими державами, числячи в том также Німеччину о новом поділі кольонии. В Лондоні уважают, же часть кольонии африканской належат ся Німеччині. Бесідуют аж и о том, штобы Німеччині признати Анголю, а Италиі - Мозамбик.

В Италиі перервала ся штучна тама на озері Горзенте и вода затопила сусідны місцевости Овада, Каприета и Моляре. По поводу оборвання хмары поднесла ся вода на озері и росорвала таму на долготі 200 м. Величезна маса воды грухнула вдолину, забераючи вшитко. В Оваді вода змыла 130 домов, а в селах Каприета и Моляре не остала ани одна хыжа. Серед населення панує страшне пригнобленє. Люды ходят як блудны, глядаючи оден другого. Обчисляют, же згинуло в воді понад 500 людей, переважно женщин и дітей.

Вісти с краю.

Под Жегестовом пов. новосандецкого іхал хлоп с Вірхомлі Ф. Ключка с деревом и в'їхал медже жел. - дор. заповори, котры собі сам двигнул, думаючи, же переїде, закла не над'їде поїзд. В той хвилі появил ся ідущий с Жегестова поїзд и было бы напевно дошло до катастрофы, як бы машинист не потрафил задержати поїзд.

Учитель бандытом. На дорозі коло Островца якийсь замаскований бандыт напав на переїзджающих и грабил их. Полиция долго не могла зловити бандыта. Аж раз в часі неудалого напада, сохавил он на возі револьвер и по том револьвері полиция дошла до того, же тым бандытом єст учитель из Кшеновиц, Щепан Грогас, котрый в день учил діти, а в ночи розбивал людей. Бандыта засуджено на 5 літ вязниці.

Процес против убийцам министра Перацкого має отбыти ся в осени т. р. Оскаржат ся 10 людей, членов О. У. Н.; в том числі кілька женщин. Материял со слідства обнимат 25 томов о 10 тысячах сторон.

Новый рок школьный начинаєт ся дня 3. вересня. В той день одбуде ся во всіх школах торжественны богослуження.

В Новом Санчі обнял уж урядованє заступник старосты гр. Мыцельский, котрый приїхал на місце перенесеного до Нового Торга д-ра Тобичика.

Новый инспектор школьный г-н. Стефаняк приїхал уж до Нового Санча и урядує. Г-н Гавский єст перенесеный до Радомя.

Добре собі выворожили. В околиці Горлиц обозовала банда циганов. До пана Вал. Нитки приїшла одна циганка с предложенєм поворожити, а як отошла от него, Нитка спостерег, же бракує єму 113 зл. Планьше

вышла ище Анеля Шиманска, котрой циганка-ворожка вкрала 180 зл. Полиция тепер глядат ворожки.

„Заплата“ за гостину. До господара в пов. торунском приїшла якась женщина с дітином на руках и просила о ночлег. Господар позволил єй переночовати в оборі. На другой день спостерег, же баба отдалила ся потихы, сохавляючи єму дітину, около 14-дневну, добре розвынену дівчинку. Подкыдышом заопековала ся полиция, котра глядат также матери.

В Варшаві спалила ся фабрика чеколяды и цукерников Яна Зюлковского. Пожар повстал от палениска в сушарні. Страты выносят кількадесят тысячей злотых.

Рольники домагают ся рочної моратории. Палаты Рольны отнесли ся до Министерства Скарбу с просьбом, штобы Министерство зарядило 1-рочну мораторию для рат, які газдове маот платити в том році на основі закона отдолженного. Закон тот предвиджал, же в случаю незаплаты двох рат, долг єст платный цілый. В виду того, же положенє господарче не поправило ся, господары не можут платити рат и тому просят о отложенє термина заплаты тых рат на 1 рок.

РЕДАКЦИЯ НЕ ОТВІЧАТ:

50 зл. денно заробит каждый, кто займе ся продажом ревелацийного, патентованого вынахода. Каждый склепар, желаючи увеличити свои обороты, повинен держати в склепі наш необходимый каждому до што-денного ужитка артыкул. За офертами писати:

Венедыкт Волявский
Краков
ул. Рыдльовка 24.

Дня 30. серпня т. р. (в пятницу) о год. 8-мой вечером в салі Здроевого Дома в Крыниці начне ся

КОНЦЕРТ МИШАНОГО КРЫНИЦКОГО ХОРУ.

Хор тот выробил собі першоклясну репутацию и в „Святі Гор“ в Закопаном одержал першу нагороду.

Билеты по ціні 3, 2 и 1 зл.
можно достати при вході на салю.

В неділю, дня 1. вересня 1935

о годині 2-гой пополудни
состоит ся в поміщеню Руской Бурсы
в Горлицах

СОВІЩАНЄ ДЕЛЕГАТОВ КООПЕРАТИВОВ
ЛЕМКОВЩИНЫ В ДІЛІ ПРИНАДЛЕЖНОСТИ КУ РЕВИЗИЙНОМУ
СОЮЗУ.

Всі кооперативы Лемковщины просиме
выслати своих делегатов.

Правленє кооп. Прогрес
в Крыниці.